

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj: 7/10), a u skladu sa Programom utroška budžetskih sredstava u 2015. godini, usvojenim Zaključkom Vlade Zeničko-dobojskog kantona, broj: 02-14-12700/15 od 04.06.2015. godine i broj: 02-14-16226/15 od 27.08.2015. godine, na prijedlog Ministarstva za privredu, Vlada Zeničko-dobojskog kantona, na 24. sjednici, održanoj dana 27.08.2015. godine, d o n o s i

ZAKLJUČAK

I.

Daje se saglasnost na Uputstvo o postupku i kriterijima za odobravanje i dodjelu (refundaciju) sredstava poticaja namijenjenih za subvencioniranje troškova jačanja konkurentnosti, koje čini sastavni dio ovog Zaključka.

II.

Za realizaciju poticaja iz tačke I. zadužuje se Ministarstvo za privredu, koje će donijeti sve provedbene akte i imenovati Komisiju za provođenje propisanog postupka.

III.

Danom stupanja na snagu ovog zaključka stavlja se van snage Zaključak, broj: 02-02-14495/15 od 10.07.2015. godine i Uputstvo o postupku i kriterijima za odobravanje i dodjelu (refundaciju) sredstva poticaja namijenjenih subvencioniranju troškova izvoza, kao sastavni dio istog.

IV.

Zaključak stupa na snagu danom donošenja.

PREMIJER

Miralem Galijašević

Broj: 02-_____/15.

Datum, 27.08.2015. godine

Zenica

DOSTAVLJENO:

1x Ministarstvo za privredu,

1x Ministarstvo finansija,

1x a/a.



UPUTSTVO
O POSTUPKU I KRITERIJIMA ZA ODOBRAVANJE I DODJELU
(REFUNDACIJU) SREDSTAVA POTICAJA NAMIJENJENIH ZA
SUBVENCIONIRANJE TROŠKOVA JAČANJA KONKURENTNOSTI

Zenica, avgust 2015. godine

Na osnovu člana 56. i 66. stav 2. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05), ministar Ministarstva za privredu Zeničko-dobojskog kantona, uz saglasnost Vlade Zeničko-dobojskog kantona, donosi:

**UPUTSTVO
O POSTUPKU I KRITERIJIMA ZA ODOBRAVANJE I DODJELU
(REFUNDACIJU) SREDSTAVA POTICAJA NAMIJENJENIH ZA
SUBVENCIONIRANJE TROŠKOVA JAČANJA KONKURENTNOSTI**

1. UVOD

Privredni subjekti iz Zeničko-dobojskog kantona su duži niz godina svoju poslovnu orijentaciju usmjerili ka povećanju kvaliteta izvoza svojih proizvoda. Zbog toga su pokazatelji vanjskotrgovinske razmjene Zeničko-dobojskog kantona daleko najbolji u Federaciji Bosne i Hercegovine, te je posljednjih godina evidentiran suficit. Međutim, bitno je istaći da je ovaj rezultat postignut uz ogromne napore, kako proceduralne, tako i materijalne.

Zbog globalne ekonomske krize, značajnih poticaja koje konkurentske zemlje realiziraju prema svojim privrednim subjektima, privredni subjekti iz Zeničko-dobojskog kantona su na ino tržištu pod izuzetnim pritiskom.

Imajući u vidu naprijed navedeno, ukazala se potreba za dizajniranje ovog poticaja i subvencioniranje dijela troškova usmjerenih za jačanje konkurentnosti privrednih subjekata, izvoznika, iz Zeničko-dobojskog kantona.

Na ovaj način bit će smanjeni troškovi jačanja konkurentnosti pozicije privrednih subjekata (povećanje efikasnosti, jačanje tehnološke baze, modernizacija poslovnog procesa, te stvaranje novih radnih mjesta).

2. CILJ POTICAJA

Cilj ovog projekta je smanjenje troškova, povećanja konkurentnosti, intenziviranje zapošljavanja i razvoja privrednih subjekata iz Zeničko-dobojskog kantona.

3. KORISNICI POTICAJA

U duhu ovog Postupka i kriterija, korisnici poticaja su privredni subjekti iz područja prerađivačkih djelatnosti (A, B, C, D- Standardna klasifikacija djelatnosti) registrovani u Zeničko-dobojskom kantonu, sa maksimalnim ukupnim prihodom za prethodnu godinu u iznosu do 7.000.000,00 KM i realiziranim izvozom za prethodnu godinu.

Jedan korisnik poticaja može koristiti samo jednu vrstu poticaja Ministarstva za privredu u tekućoj budžetskoj godini.

Korisnik poticaja može koristiti poticaj samo u jednom ministarstvu Zeničko-dobojskog kantona.

4. IZNOS POTICAJA

Sredstva za subvencioniranje troškova jačanja konkurentnosti obezbjeđuju se Budžetom Zeničko-dobojskog kantona i planiraju Programom utroška sredstava Ministarstva za privredu, te odgovarajućom Odlukom Vlade Kantona za svakog podnosioca zahtjeva pojedinačno.

Vlada Kantona subvencionira (refundira) dio troškova za privredne subjekte registrovane na području Zeničko-dobojskog kantona, u iznosu od 3% od fakturisanog iznosa izvoza, u KM, u prethodnoj godini, ali ne više od 25.000,00 KM po godini.

5. ZAHTJEV ZA ODOBRAVANJE POTICAJA

Uredan Zahtjev za odobravanje (refundaciju) sredstava poticaja, privredni subjekt je dužan podnijeti Ministarstvu za privredu.

U razmatranje će se uzeti samo zahtjevi koji budu podneseni u roku od 60 (šezdeset) dana od dana objavljivanja Javnog poziva.

Uz zahtjev privredni subjekt dostavlja sljedeće priloge:

- Original ili ovjerenu kopiju Bilansa stanja i Bilansa uspjeha za prethodnu godinu;
- Original ili ovjerenu kopiju fakture za realizirani izvoz u prethodnoj godini ovjeren od nadležnog carinskog organa (JCI- deklaracija carine na izlazu iz Bosne i Hercegovine);
- Original ili ovjerenu kopiju Odobrenja za obavljanje proizvodne djelatnosti u skladu sa članom 7. Zakona o privrednim društvima;
- Original ili ovjerenu kopiju uvjerenja o uredno izmirenim javnim prihodima - ne starije od 60 dana u odnosu na dan podnošenja zahtjeva;
- Original ili ovjerenu kopiju uvjerenja o uredno izmirenim indirektnim porezima - ne starije od 60 dana u odnosu na dan podnošenja zahtjeva;
- Original ili ovjerenu kopiju Uvjerenja o uredno izmirenim finansijskim obavezama prema Budžetu Zeničko-dobojskog kantona, ne starije od 60 dana u odnosu na dan podnošenja zahtjeva;
- Uvjerenje komercijalne banke da je žiro račun izvoznika aktivan, ne starije od 60 dana u odnosu na dan podnošenja zahtjeva.;
- Original ili ovjerenu kopiju Certifikata o BH porijeklu proizvoda sa JCI deklaracije izdat od Vanjsko-trgovinske komore Bosne i Hercegovine.

6. KOMISIJSKA OCJENA I NEGATIVNO RJEŠENJE

Komisiju za ocjenu ispunjenja uvjeta i kriterija za dodjelu poticajnih sredstava imenuje i razrješava ministar u Ministarstvu za privredu. Za svoj rad ova komisija odgovara ministru Ministarstva za privredu.

Komisija razmatra Zahtjeve privrednih subjekata poštujući hronologiju prijema ovih akata u protokolu prijemnih akata Ministarstva, odnosno Vlade Kantona, te cijeni ispunjenost uvjeta i kriterija za odobravanje sredstava.

Izvještaj o ocjeni i mišljenju, Komisija dostavlja ministru Ministarstva za privredu.

U slučaju da Komisija ocijeni da nisu ispunjeni svi uslovi za odobravanje sredstava, ona predlaže, a Ministarstvo za privredu, kod neispunjenja uvjeta i kriterija donosi Obavijest, koju prosljeđuje podnosiocu Zahtjeva.

7. POSTUPAK ODOBRAVANJA

Na osnovu Izvještaja o ocjeni i mišljenja Komisije, Ministarstvo za privredu predlaže Vladi Kantona donošenje Odluke o odobravanju poticajnih sredstava. Pojedinačne odluke Vlada donosi shodno raspoloživim sredstvima za tekuću godinu, a prednost u odobravanju sredstava poticaja ima onaj korisnik koji je ranije podnio zahtjev za koji je utvrđeno da ispunjava uvjete i zadovoljava kriterije dodjele.

Na početku svake godine Vlada Kantona odlučuje o nastavku dodjele ovih poticaja općenito, shodno projekciji budžetskih rashoda za tekuću godinu, o čemu donosi Zaključak o usvajanju Programa utroška sredstava u Ministarstvu za privredu.

8. REFUNDACIJA SREDSTAVA – REALIZACIJA POTICAJA

Na osnovu Odluke o odobravanju sredstava Ministarstvo za privredu podnosi Nalog za isplatu sredstava Ministarstvu finansija.

9. RANIJE VAŽEĆI AKTI, KRITERIJI I POSTUPCI

Ovim aktom stavljaju se van snage i prestaju vrijediti svi raniji akti kojima su propisivani prethodno važeći kriteriji i postupci te utvrđivane nadležnosti u odobravanju i realizaciji ovog Vladinog programa poticaja.

Broj: 04-14-12700-9/15
Zenica, 17.08.2015. godine

MINISTAR

Zvonimir Anđelić dipl.ing.grad.